



LALANA laharana faha 2014 –021 tamin'ny ... 2014 mikasika ny fisoloantenam-panjakana

FAMELABELARANA NY ANTONANTONY

Ity lalàna ity dia noraisina ho fampiharana ny fepetra voalazan'ny andininy faha-145 ao amin'ny Lalàmpanorenana, ary mametraka ny andinin-dalàna momba ny fisoloantenam-panjakana eny anivon'ireo vondrombahoakam-paritra itsinjaram-pahefana.

Ity lalàna ity dia maneho fa ilaina tokoa nyiantohana ny fandairana sy ny fahombiazan'ny asan'ny fitantanandraharaham-panjakana eny amin'ny lafitany amin'ny alalan'ny fanamafisana ny andraikitra fandrindrana sy fanampian-tosika ataon'ny Solontenam-panjakana amin'ireo sampandraharaham-panjakanaanapariaham-pitondrana.

Ity lalàna ity diampampisongadinany fitohizan'ny fitantanandraharaham-panjakana foibe any anivon'ny lafitany.

Ankoatra izany, ny fanatanterahana ny fitsinjaram-pahefana tena izy dia mila fomba fijery vaovao amin'ny famaritana ny andraikitra mpitan-tsoroka sy mpanoro hevitra ataon'ny Solontenam-panjakana amin'ireo manam-pahefana eny amin'ny vondrombahoakam-paritra, nefa tsy mihataka amin'ny andraikiny amin'ny fanaraha-maso ny fanarahan-dalàna.

Araka nyfotokevi-dehibe milaza fa isaky ny ambaratonga-na vondrombahoakam-paritra itsinjaram-pahefana dia misy rafitra anapariaham-pitondrana mifanandrify aminy, ny Kaomisera Jeneraly no misahana ny fisoloantenam-panjakana eny anivon'ny Faritany, izay vondrombahoakam-paritra vaovaovoalazan'ny Lalàmpanorenana.

Eny anivon'ny Faritra, mba iantohana ny fizakan-tena ara-pitantanan'ny vondrombahoakam-paritra itsinjaram-pahefana dia tsy azo ialàna ny fanasarahana ny andraikity ny lehiben'ny mpanatanteraka sy ny Solontenam-panjakana, ka izay indrindra no ametrahana ny Prefe ho Solontenam-panjakana eny anivon'ny Faritra.

Ny Lehiben'ny Distrika no misahana ny asan'ny Solontenam-panjakana eny anivon'ny Kaominina.

Iy lalàna ity dia manamafy sy manazava bebe kokoa nyanjara andraikity ny Solontenam-panjakana.

Ity lalàna ity dia misy andininy roa amby telopolo, ary mizara ho toko dimy :

- Toko voalohany : Fepetra ankapobeny
- Toko faharoa : Ny amin'ny fandaminana sy ny fomba fiasan'ny fisoloantenam-panjakana
- Toko fahatelo : Ny amin'ny anjaraandraikitry ny Solontenam-panjakana
- Toko fahefatra : Ny amin'ny fanaraha-maso ny fanarahan-dalàna
- Toko fahadimy : Fepetra farany

Antananarivo, faha-



LALANA laharana faha 2014 –021 tamin'ny ... 2014 mikasika ny fisoloantenam-panjakana

Ny Antenimieram-pirenena no nandany tamin'ny fivoriana nataony 22 aogositra 2014 ;

NY FILOHAN'NY REPOBLIKA,

Araka ny Lalàmpanorenana,
Araka ny fanapahana laharana faha25–HCC/D3 tamin'ny 10 septambra 2014 navoakan'ny
Fitsarana Avo momba ny Lalàmpanorenana,

DIA MAMOAKA HAMPANAN-KERY NY LALANA IZAY TOY IZAO NY ANDININDININY:

Toko voalohany Fepetra ankapobeny

Andininy voalohany – Ho fampiharana ny andininy faha-145 ao amin'ny Lalàmpanorenana, ity lalàna ity dia mifehy ny fisoloantenam-panjakana eny anivon'ireo vondrombahoakam-paritra itsinjaram-pahefana.

Izy no mametraka nyfoto-kevi-dehibe mikasika ny fandaminana, ny fomba fiasa ary ny anjara andraikitry ny fisoloantenam-panjakana.

And. 2 – Mpiasam-panjakana manana ny fahalalana sy ny traikefa takian'izany andraikitra izany no misahana ny asan'ny Solontenam-panjakana.

Didim-panjakana raisina eo ampivorian'ny Filankevitry ny Minisitra, araka ny tolo-kevitra ny Minisitra misahana ny Atitany, no anendrena azy.

And. 3 – Ny faripiadidiam-panjakana no sehatra anatanterahana ny asa maha Solontenam-panjakana.

Ny faripiadidiam-panjakana dia fizarana ara-pitantanan-draharaham-panjakana eo anivon'ny lafitany ary ao anatin'izany no ametrahana ireo sampan-draharaham-panjakana anapariaham-pitondrana. Ao anatin'izany fari-piadidiana izany no anatanterahana sy anatontosana ny torolàlana avy amin'ny fitondrana foibe.

Toko faharoa
Ny amin'ny fandaminana sy ny fomba fiasan'ny fisoloantenam-panjakana

Sokajy voalohany
Ny amin'ny fandaminana

And.4 – Ireto avy ireo fari-piadidiam-panjakana :

- Ny Faritany ;
- Ny Prefektiora ;
- Ny Distrika ;
- Ny Boriboritanim-panjakana.

Ny Boriboritanim-panjakana dia ahitana ireo fizarazarana ara-pitantanan-draharaham-panjakanafototra antsoina hoe Fokontany.

And.5 – Ny Solontenam-panjakana isaky ny ambaratonga-na faripiadidiam-panjakana dia mitondra ireto anarana ireto :

- « Kaomisera jeneraly » ;
- « Prefe » ;
- « Lehiben'ny Distrika ».

Ny Lehiben'ny Boriboritanim-panjakana dia mpanampy ny Lehiben'ny Distrika.

And. 6 – Ny Kaomisera Jeneraly no misolotena ny Fanjakana eo anivon'ny Faritany.

And. 7 – Ny Prefe no misolotena ny Fanjakana eo anivon'ny Faritra.

And. 8 – Ny Lehiben'ny Distrika no misolotena ny Fanjakana eo anivon'ny Kaominina.

And. 9 – Ny Kaomisera Jeneraly sy ny Prefe dia samy manana sekretaria jeneraly tsirairay avy.

Didim-panjakana raisina eo ampivorian'ny Filankevitry ny Minisitra araka ny tolo-kevitra ny Minisitra misahana ny Atitany no manendry ny Sekretera jeneraly.

Ny Lehiben'ny Distrika dia manana lefitra roa ka ny iray dia misahana ny fitantanan-draharaham-panjakana ankapobeny sy ny lafitany ary ny iray kosa misahana ny fanohanana ny Kaominina sy ny fampandrosoana eny ifotony. Didim-pitondrana raisin'ny Minisitra misahana ny Atitany no manendry azy ireo.

Sokajy faharoa
Ny amin'ny fomba fiasa

And. 10 – Ny Solontenam-panjakana dia manatanteraka fivoriana fanao ara-potoana miaraka amin'ireo sampan-draharaham-panjakana anapariaham-pitondrana ao anatin'ny fari-piadidiany.

Azony atao koa nymivory miaraka ireo tompon'andraikitra ny Vondrom-bahoakam-paritra itsinjaram-pahefana ao anatin'ny asa fanohananasany fanoroan-kevitra sahaniny.

And. 11 – Eo am-panatanterahana ny asany, ny Solontenam-panjakana dia tsy maintsy manao fanamiana, voatokana ho amin'izany, indrindra mandritra ireo lanonam-panjakana.

And. 12 – Ny Kaomisaria jeneraly, ny Prefektiora ary ny Distrika dia manana teti-bola fampandehanan-draharaha isan-taona izay iantohan'ny teti-bola ankapoben'ny Fanjakana.

And. 13 – Ny Solontenam-panjakana dia tsy maintsy monina eo amin'ny renivohitry ny fari-piadiadiany.

And. 14 – Ny Solontenam-panjakana dia afaka mamindra ampahany amin'ireo andraikitra sahaniny amin'ny Sekretera Jeneraly na amin'ireo lefiny arakaraky ny zava-misy.

Toko fahatelo **Ny amin'ny anjara andraikity ny Solontenam-panjakana**

And. 15 – Ny Solontenam-panjakana dia misolo tena ny Praiminisitra, Lehiben'ny Governemanta ary koa ny Minisitra tsirairay, mpikambana ao amin'ny Governemanta.

Amin'izany, izy no miantoka ny fitohizan'ny fitantanan-draharaham-panjakana foibe eo anivon'ny fari-piadiadiany.

And. 16 – Ny Solontenam-panjakana dia :

- miantoka ny fanatanterahana ny politika ankapoben'ny Fanjakana ao anatin'ny fari-piadiadiany ;
- manana fahefana amin'ireo lehiben'ny sampandraharaham-panjakana anapariaham-pitondrana misy ao anatin'ny fari-piadiadiany.

And. 17 – Ny Solontenam-panjakanano manentana, mandrindra ary manara-maso ny asan'ireo sampandraharaham-panjakana anapariaham-pitondrana samihafa misy ao anatin'ny fari-piadiadiany.

Amin'izany :

- ny Solontenam-panjakana dia mahazo dika mitovy amin'ireo taratasy fifandraisana ara-panjakana rehetra avy amin'ny Minisitra na ny Sekreteram-panjakana ho an'ireo sampandraharahany anapariaham-pitondrana, ary koa ny tatitra mikasika ny asan'ireo sampandraharaha ireo alefa any amin'ny Minisitra voakasika ;
- izy dia ampahafantar'ireo manam-pahefana mandidymomba ny fitsidihanana iraka ataon'ny mpiasam-panjakana ao anatin'ny fari-piadiadiany ;
- izy no mampiantso sy mitarika ny fivoriana fanao ara-potoana iarahany amin'ireo tompon'andraikity ny sampandraharaham-panjakana anapariaham-pitondrana, ary anaovany tatitra momba izany ny lehibeny isan'ambaratonga ;
- izy dia tsy maintsy mahazo dika mitovy amin'ireo fanapahanamikasika ny famindran-toerana, fanomezana naoty ary ny fialan-tsasatra ho an'ny mpiasam-panjakana ao anatin'ny fari-piadiadiany.

And. 18 – Azon'ny Solontenam-panjakana atao ny mandray sora-draharaham-panjakanamanana endrika fanapahana na didim-pitondrana.

Amin'izany :

- izy no misahana ny andraikitra manokana ankinin'ny didy aman-dalàna aminy ;
- izy no mitandro ny fampiharana sy fanatanterahana ny didy aman-dalàna ;
- izy no misahana ny fanatanterahana sy ny fanaraha-maso ny torolàlana avy amin'ny Governemanta ;
- izy no mampahafantatra ara-potoanany olom-boafidy sy ny mponina mikasika ny politika ankapoben'ny Fanjakana sy ny asan'ny Governemanta ;
- ary izy no manao tatitra amin'ny Governemanta mikasika ny toejava-misy ao amin'ny fari-piadidiany.

And. 19 – Ny Solotenam-panjakanadia mahazo dika mitovy amin'ireo fanapahana ara-pitsarana mamoka sazy ka manohintohina ny zon'ny isambatan'olona sy zo maha-olompirenena mahakasika ny mponina ao amin'ny fari-piadidiany.

And. 20 – Ny Solotenam-panjakana dia tompon'andraikitra amin'ny fandriam-pahalemana sy ny filaminam-bahoaka.

Izy no mitarika nyrafitra misahana ny famaritana ny paikady sy ny fepetra raisina ho fiarovana sy fitandroana ny fandriam-pahalemana sy ny filaminam-bahoaka ao anatin'ny fari-piadidiany.

Amin'izany, afaka mampiasa ny hery fitandroana ny filaminana rehetra mijanona ao amin'ny fari-piadidiany izy. Izy no mangataka, araka ny fombafomba voalazan'ny lalàna, ny andian'nyZandarimaria sy ny Tafika mijanona ao amin'ny fari-piadidiany.

And. 21 – Ny rafitra voalazan'ny andininy etsy aloha dia ahitana ny Solontenam-panjakana mahefa eny amin'ny lafitany, ny lehiben'ny fampanoavana, ary ny kaomandin'ny andian'ny mpitandro ny filaminana mijanona ao amin'ny fari-piadidiany.

And. 22 – Ny Solotenam-panjakana dia mitan-tsoroka sy manoro hevitra ny rafitr'ireo Vondrombahoakam-paritra itsinjaram-pahefana amin'ny fanatanterahana ny anjara andraikitr'izy ireo.

And. 23 – Ny Solotenam-panjakana dia manana fahefana hanolotra mari-boninahitra ao anatin'ny fari-piadidiany, arakany fepetra voalazan'ny lalàna manan-kery.

Toko fahefatra **Ny amin'ny fanaraha-maso ny fanarahan-dalàna**

And. 24 – Ny Solotenam-panjakana no miandraikitra ny fanaraha-maso ny fanarahan-dalàna amin'ireo sora-draharaha noraisin'ny Vondrombahoakam-paritra itsinjaram-pahefana.

Araka izany :

- ny Kaomisera jeneraly no misahana ny fanaraha-maso ny fanarahan-dalàna amin'ny sora-draharaha noraisin'ny Faritany ;
- ny Prefe no misahana ny fanaraha-maso ny fanarahan-dalàna amin'ny sora-draharaha noraisin'ny Faritra ;
- nyLehiben'ny Distrika no misahana ny fanaraha-maso ny fanarahan-dalàna amin'ny sora-draharaha noraisin'ny Kaominina.

Azon'ny Solontenam-panjakana atao nymampakatra eny amin'ny antokom-pitsarana mahefa arakaraky ny zava-misy.

And. 25 – Ny sora-draharaha raisin'ny rafitr'ireo vondrombahoakam-paritra itsinjaram-pahefana dia tsy maintsy alefa avy hatrany any amin'ny Solontenam-panjakana, izay manome tapakila manamarina ny naharaisany azy ireny.

And. 26 – Ny Solontenam-panjakana no mampakatra eny amin'ny antokom-pitsarana mahefa, ireo sora-draharaha izay heveriny fa mifanohitra amin'ny lalàna, ao anatin'ny telopolo andro manaraka ny naharaisana azy.

And. 27 – Raha ny Solontenam-panjakanaeo anivon'ny vondrombahoakam-paritra itsinjaram-pahefana no mampakatra ny sora-draharaha any amin'ny antokom-pitsarana mahefa, dia ampahafantariny tsy misy hatak'andro ny vondrombahoakam-paritra voakasik'izany, ary ampahalalainy azy daholo ny fanamarihana mikasika ny tsy fanarahan-dalàna hita ao amin'ilay sora-draharaha.

And. 28 – Ny Solontenam-panjakana dia afaka mampiaraka amin'ny fampakarana ataony, fangatahana fampihantonana ny fanatanterahana ny sora-draharaha voakasik'izany. Omena rarinyavy hatrany izany fangatahana izany raha hita, eo am-panaovana famotorana, fa marimpototra ny antony iray voalaza ao anatin'ny fitoriana.

Toko fahadimy Fepetra farany

And. 29 – Rijan-tenin'ny didy amam-pitsipika no hamaritra ny fombafomba fampiharana ity lalàna ity.

And. 30 – Manan-jo hahazo tambin-karama sy tombontsoa isan-karazany mifandraika amin'ny andraikiny ny Solontenam-panjakana, ka didy amam-pitsipika no hametra ny karazany sy ny fetrany.

And. 31 – Foanana ary dia foana ireo fepetra rehetra teo aloha mifanohitra amin'ity lalàna ity, mahakasika ny fisoloantenam-panjakana, fa indrindra :

- ny lalàna laharana faha 94-008 tamin'ny 26 aprily 1995 mametra ny fitsipika mikasika ny fandaminana, ny fomba fiasa ary ny tandrifim-pahefan'ny vondrombahoakam-paritra itsinjaram-pahefana ;
- ny lalàna laharana faha 2004-001 tamin'ny 17 jiona 2004 mikasika ny Faritra.

And. 32 – Ity lalàna ity dia havoaka amin'ny *Gazetim-panjakan'ny Repoblika*.

Hotanterahina izany fa Lalàm-panjakana.

Navoaka hanan-kery teto Antananarivo ny